

ԳԼՈՒԽ Է.

ԱՆԴՐԿՈՎԿԱՍԵԱՆ ՍԷՅՄԸ ԵՒ ՆԵՐՔԻՆ ԱՆՀԱՄԱՁԱՅՆՈՒԹԻՒՆՆԵՐԸ

Բայց ի՞նչ էր ներկայացնում այդ ժամանակ Անդրկովկասը: Որքա՞ն ընդունակ էր նա դիմադրելու թիւրքերին:

Տեսանք արդէն, որ նոյեմբ. 27-ին Անդրկ. Առանձին Կոմիտէն փոխարինւեց Անդրկ. Կոմիտարիատով: Այս փոփոխութիւնը, սակայն, իրական բարելաւում չբերեց: Ճակատի ու թիկունքի քայքայումը շարունակեց անարդէլ՝ միշտ ընդարձակելով ու խորանալով: Գրեթէ ամբողջ ժամանակ կառավարութիւնը զբաղւած էր բանակի նահանջի ու մահմետական շարժումների հետ կապւած խնդիրներով, պարենաւորման ու ելեմտական տաղնապի դէմ կուելով, պատերազմի հաշտարարին վերաբերող և նման հարցերով: Կազմակերպական և շինարար աշխատանք կատարելու հնարաւորութիւն չէր մնում: Միակ «շինարար» աշխատանքը եղաւ անդրկովկասեան բոների հրատարակութիւնը փետր. 6-ին, որ մասամբ մեղմացրեց դրամական սովը:

Անդրկ. Կոմիտարիատը ներքնապէս էլ ներդաշնակ ու հաշտ չէր: Ազգային ներհակութիւնները մաշում էին նրա հիմքը: Իշխանութեան իրական ոյժը աւելի և աւելի տեղափոխւում էր ազգային խորհուրդներին մէջ, որոնցից իւրաքանչիւրը իր ազգի շահերն էր պաշտպանում: Դրան մեծապէս նպաստում էր և կովկասեան ժողովուրդների քաղաքական հակումի՝ օրիէնտացիայի տարբերութիւնը: Մինչ հայերը և, որոշ չափով, վրացիները համարւում էին հակաթիւրքական կողմ, մահմետականները շեշտւած թիւրքասէրներ էին և թիւրքիայի գործերը շատ մօտ էին ընդունում իրենց սրտին: Հակումի ներհակութիւնից առաջ էին դալիս և Անդրկ. Կոմիտարիատի ներսում աճող սուր անհամաձայնութիւնները պատերազմի խնդրում. Կոմիտարիատի մահմետական անդամները ամէն գնով աշխատում էին արագացնել հաշտութիւնը թիւրքերի հետ՝ թիւրքիայի համար նպաստաւոր պայմաններով, նոյնիսկ Կովկասի շահերին ի վնաս:

Այսպիսի հանդամանքներում գործող մի իշխանութիւն, ի հարկէ, չէր կարող երևան բերել ոյժ ու հեղինակութիւն, իսկ նրա կառավարած երկիրը չէր կարող լինել խաղաղ ու բարգաւաճ: Եւ, իրօք, երկիրը ներկայացնում էր քառասային մի վիճակ:

Սէյմի փետր. 13-ի նիստում Գեղեճկորին այսպէս էր բնորոշում Անդրկովկասի դրութիւնը դեկտեմբեր-յունւար ամիսներին. «Մեր ընդարձակ և բազմացեղ երկրի բոլոր կէտերում, բոլոր շրջաններում առաջ էին դալիս թիւրքիմացութիւններ ու բռնութիւններ թէ ազգային հողի վրա և թէ հեռա-